

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva za prostorno uređenje, promet i komunikacije i zaštitu okoline, Vlada Zeničko-dobojskog kantona, na 128. sjednici, održanoj dana 08.05.2026. godine, d o n o s i

## ZAKLJUČAK

### I

Prihvata se Informacija o stanju upravljanja komunalnim otpadom u Zeničko-dobojskom kantonu Ministarstva za prostorno uređenje, promet i komunikacije i zaštitu okoline Zeničko-dobojskog kantona, broj: 12-19-7305/26 od 14.04.2026. godine, koja čini sastavni dio ovog zaključka.

### II

Vlada Zeničko-dobojskog kantona podržava nastavak saradnje sa Evropskom bankom za obnovu i razvoj (EBRD) na pripremi projekta unapređenja sistema upravljanja komunalnim otpadom.

### III

Vlada Zeničko-dobojskog kantona potvrđuje spremnost da razmotri potencijalno kreditno zaduženje kod EBRD-a za finansiranje investicionih troškova projekta, ukoliko rezultati scoping studije pokažu da je projekat ekonomski opravdan.

### IV

Zadužuje se Ministarstvo za prostorno uređenje, promet i komunikacije i zaštitu okoline da, u saradnji sa EBRD-om i Općinom Maglaj, učestvuje u realizaciji aktivnosti pripreme projekta, uključujući izradu studije preliminarnog obuhvata projekta.

### V

Zadužuje se Ministarstvo za prostorno uređenje, promet i komunikacije i zaštitu okoline da Vladu Zeničko-dobojskog kantona redovno informira o napretku pripreme projekta i rezultatima studije.

### VI

Zaključak stupa na snagu danom donošenja.

Broj: 02-\_\_\_\_\_/26  
Datum, 08.05.2026. godine  
Zenica

**PREMIJER**

*Nezir Pivić*

DOSTAVLJENO:

1x Ministarstvo za prostorno uređenje,  
    promet i komunikacije i zaštitu okoline,  
1x Ministarstvo finansija,  
1x a/a.



Broj: 12-19-7305/26  
Zenica, 14.04.2026.godine

**ZENIČKO-DOBOJSKI KANTON**  
**VLADA ZENIČKO-DOBOJSKOG KANTONA**  
n/r premijer

**STRUČNA SLUŽBA VLADE**  
n/r sekretar

**PREDMET:** Informacija o stanju upravljanja komunalnim otpadom, dostavlja se

Poštovani,

Ministarstvo za prostorno uređenje, promet i komunikacije i zaštitu okoline Zeničko-dobojskog kantona je zaprimilo obavještenje direktorice Evroopske banke za obnovu i razvoj (EBRD) za Bosnu i Hercegovinu, gospođe Stele Melnic, o Projektu upravljanja čvrstim otpadom za sjeverni dio Zeničko-dobojskog kantona. U tom smislu, dostavljamo slijedeću

#### **INFORMACIJU**

**o stanju upravljanja komunalnim otpadom u Zeničko-dobojskom kantonu**

#### **UVOD - Problematika upravljanja otpadom u Zeničko-dobojskom kantonu**

Upravljanje komunalnim otpadom predstavlja jedno od najznačajnijih pitanja zaštite okoliša i komunalne infrastrukture u Zeničko-dobojskom kantonu. Riječ je o oblasti koja direktno utiče na kvalitet života stanovništva, zaštitu prirodnih resursa, javno zdravlje, uređenje prostora, kao i na ispunjavanje domaćih i međunarodnih obaveza Bosne i Hercegovine u procesu usklađivanja sa pravnom stečevinom Evropske unije.

Zeničko-dobojski kanton obuhvata površinu od približno 3.415 km<sup>2</sup>, sa ukupno 12 jedinica lokalne samouprave i oko 364.433 stanovnika, od čega značajan dio živi u ruralnim i geografski teže dostupnim područjima. Takva teritorijalna i demografska struktura dodatno usložnjava organizaciju efikasnog, finansijski održivog i okolišno prihvatljivog sistema prikupljanja, transporta, tretmana i konačnog zbrinjavanja otpada.

Prema raspoloživim podacima, organizovanim sistemom prikupljanja komunalnog otpada trenutno je obuhvaćeno oko 92% stanovništva kantona, dok preostali dio, uglavnom u udaljenim i slabije naseljenim ruralnim područjima, još uvijek nije u potpunosti obuhvaćen javnom uslugom. Ukupna evidentirana količina prikupljenog komunalnog otpada na području kantona iznosi približno 88.338 tona godišnje, uz procjenu da su stvarne količine i veće zbog neevidentiranih tokova otpada, nelegalnog odlaganja i drugih oblika neformalnog postupanja s otpadom.

Postojeći sistem upravljanja otpadom u kantonu i dalje je dominantno zasnovan na odlaganju otpada, uz nedovoljno razvijene kapacitete za selekciju, reciklažu, kompostiranje i druge oblike tretmana. Poseban izazov predstavlja činjenica da na području kantona ne postoje formalna postrojenja za tretman, sortiranje, kompostiranje ili reciklažu otpada, zbog čega se praktično sav prikupljeni otpad odlaže na deponije, uključujući i one frakcije otpada koje bi se mogle ponovo iskoristiti ili reciklirati.

Dodatno, iako regionalna sanitarna deponija Mošćanica predstavlja važan infrastrukturni oslonac za dio kantona, više jedinica lokalne samouprave i dalje koristi lokalna odlagališta koja ne ispunjavaju savremene sanitarne i okolišne standarde. U dokumentaciji za pripremu projekta unapređenja sistema upravljanja komunalnim otpadom, odnosno uspostave integriranog kantonalnog sistema upravljanja otpadom, posebno je konstatovano da općine Kakanj, Tešanj, Olovo, Maglaj i Vareš još uvijek koriste lokalne deponije koje ne zadovoljavaju EU sanitarne standarde, te da su takve lokacije dugoročno povezane sa rizicima po zemljište, vode, zrak i zdravlje stanovništva.

Upravo iz tih razloga uspostava integriranog kantonalnog sistema upravljanja otpadom nameće se kao strateški prioritet. Takav sistem treba omogućiti potpuniji obuhvat stanovništva uslugom prikupljanja otpada, razvoj odvojenog prikupljanja korisnih frakcija, izgradnju regionalne infrastrukture za tretman otpada, smanjenje količina otpada koje završavaju na deponijama, kao i postepeno zatvaranje i sanaciju neusklađenih odlagališta.

Potreba za ovakvim pristupom dodatno je potvrđena i kroz planske dokumente višeg nivoa vlasti. Naime, u pripremljenoj dokumentaciji za projekat posebno je naglašeno da je važeći Kantonalni plan upravljanja otpadom iz 2009. godine u postupku sveobuhvatne revizije, upravo radi usklađivanja sa Federalnim planom upravljanja otpadom, čiji je nacrt pripremljen, i u kojem je predviđeno uspostavljanje savremenog, regionalno organizovanog i sa EU direktivama usklađenog sistema upravljanja otpadom. U tom kontekstu, za područje Zeničko-dobojskog kantona prepoznata je potreba formiranja dva centra za upravljanje otpadom, i to jednog za sjeverni dio kantona, čija je lokacija okvirno razmatrana kroz međusobne konsultacije i preliminarne analize, uključujući i područje općine Maglaj, te drugog za južni dio kantona sa osloncem na postojeću regionalnu sanitarnu deponiju Mošćanica.

### **Projekat “Unapređenje sistema upravljanja komunalnim otpadom u Zeničko-dobojskom kantonu“**

Tokom proteklih više od šest mjeseci Ministarstvo za prostorno uređenje, promet i komunikacije i zaštitu okoline Zeničko-dobojskog kantona vodi intenzivne razgovore sa Evropskom bankom za obnovu i razvoj (EBRD) u vezi sa pripremom budućeg projekta unapređenja sistema upravljanja komunalnim otpadom. U tom periodu održan je niz radnih sastanaka, uključujući razgovore sa predstavnicima lokalne zajednice Maglaj, koja je iskazala zainteresovanost za projekat, a izvršen je i obilazak terena u cilju sagledavanja prostornih i tehničkih pretpostavki za razvoj buduće infrastrukture. Ove aktivnosti doprinijele su da se projektna ideja dodatno konkretizira i uobliči kao mogući prioritetni infrastrukturni projekat za naredni period.

U tom smislu, EBRD je iskazao spremnost da obezbijedi grant sredstva za izradu studije preliminarnog obuhvata projekta, kao početnog stručnog dokumenta kojim bi se sagledali osnovni tehnički, institucionalni, prostorni i investicioni parametri budućeg integriranog sistema upravljanja komunalnim otpadom na području Zeničko-dobojskog kantona.

Prema informacijama koje smo dobili od predstavnika EBRD-a, uslovi pod kojima bi se mogao obezbijediti kredit su:

**Kamatna stopa:** Euribor+1%

**Rok otplate:** 4 godine grace period + 14 godina otplate (ukupno 18 godina).

**Minimalni iznos kredita** kod EBRD-a je 10 miliona eura, a moglo bi se organizirati zajednički nastup sa Tuzlanskim kantonom sa kojima EBRD također pregovara vezano za projekat unapređenja sistema upravljanja otpadom.

Prema informacijama dobijenim od predstavnika EBRD-a mogućnost pribavljanja grant sredstava je najveća kroz Investicioni okvir za Zapadni Balkan - WBIF, gdje je potrebno uložiti zajedničke napore za mobilizaciju a s obzirom da se kroz ovaj program projekti upravljanja otpadom maksimalno potenciraju. Tačni iznosi kredita i granta za ovaj projekt biti detaljnije poznati nakon provođenja studije izvodljivosti.

Prema usaglašenim projektnim zadacima, ova studija treba da pruži analitičku osnovu za pripremu budućeg investicionog projekta i donošenje strateških odluka u vezi sa organizacijom sistema upravljanja otpadom. Studija će, između ostalog, obuhvatiti detaljnu analizu postojećeg stanja sistema upravljanja komunalnim otpadom u kantonu, uključujući procjenu količina otpada koje nastaju i prikupljaju se, analizu demografskih i prostornih karakteristika kantona, kao i procjenu budućih trendova nastanka otpada.

U okviru studije bit će izvršena i procjena optimalnog regionalnog modela organizacije sistema upravljanja otpadom, uključujući definisanje potencijalnih zona prikupljanja otpada, potrebu za transfer stanicama, kao i identifikaciju mogućih lokacija za regionalne centre za upravljanje otpadom. Studija će razmotriti i različite tehničke opcije za tretman otpada, uključujući mehaničko-biološki tretman, sortiranje i reciklažu korisnih frakcija, tretman biootpada, kao i druge tehnologije koje omogućavaju smanjenje količina otpada koje se odlažu na deponije i povećanje stepena ponovne upotrebe i reciklaže.

Pored tehničkih aspekata, studija će obuhvatiti i procjenu institucionalnog i organizacionog modela za upravljanje budućim sistemom, uključujući moguće modele saradnje između jedinica lokalne samouprave, komunalnih preduzeća i kantonalnih institucija, kao i procjenu finansijske održivosti sistema. Također će biti izrađena preliminarna procjena investicionih troškova (CAPEX) i operativnih troškova (OPEX) za različite scenarije razvoja sistema, što će omogućiti donošenje informisanih odluka o obimu i fazama realizacije budućeg projekta.

Očekivani rezultat studije preliminarnog obuhvata projekta je definisanje optimalnog koncepta integriranog sistema upravljanja komunalnim otpadom na području Zeničko-dobojskog kantona, identifikacija prioriternih investicija i infrastrukturnih komponenti sistema, kao i priprema osnove za narednu fazu pripreme projekta, koja podrazumijeva izradu detaljnih studija izvodljivosti i projektne dokumentacije. Istovremeno je naglašeno da bi se, nakon izrade studije i definisanja investicionog projekta, moglo pristupiti mobilizaciji dodatnih sredstava međunarodnih partnera, uključujući Evropsku uniju, Investicioni okvir za Zapadni Balkan - WBIF i bilateralne donatore. U tom kontekstu, postoji mogućnost da se za realizaciju investicionog projekta osigura značajan udio grant sredstava, potencijalno i do oko 70% ukupne vrijednosti investicije.

U tom smislu, predlažamo Vladi da podrži uključivanje Zeničko-dobojskog kantona u jedan ovakav strateški projekat.

**Dostavljeno:**

- 1 x Naslovu,
- 1 x Ministarstvo finansija,
- 1 x a/a.

**MINISTAR**  
*Adnan Šabani*